

(77) Viro generosissimo atque praenobilissimo
 D. D. C. a Linné
 Archiatro regio, Equiti splendidissimo
 Professore celeberrimo etc. etc.
 s. p. d.
 J. C. Fabricius

E litteris TVIS nouissimis in Hollandia acceptis nouam et sane singularem de fungis theoriam laetus accepi. Diu iam miratus fui fungos chemice in prima destillatione haud acidum vti vegetabilia, sed Alkali vti animalia praebere, obseruante Geoffroyeo. Me quidem haud fugit principia chemica saepius in historia naturali fallacia, attamen saltem aliquid ponderis nouae theoriae afferunt. Structura cum Zoophytis et Lithophytis admodum conuenit, quamuis substantia differat. Optarem sane accuratiorem de tanta obseruatione ideam, quum mihi ipsi microscopia ad hoc negotium apta desunt.

Ante aliquot dies a parua excursionem in montosis Scotiae instituta reueni. Liceat nunc obseruata, quamuis pauca, summo praeceptori communicare.

Constat haec regio e rupibus sterilissimis, altis, nudis, Erica cinerea et vulgari vndique tectis. Arboreta omnino nulla, fruteta pauca et vix alia nisi plantata, e Corylo, Betula, Alno, Vlice, Rosis et Rubis. Vnde plantae nemorosae et umbrosae hic rarissimae. Lacus et paludes vndique abundant. Plantas inueni quasdam alpinas, quamuis montes Scotiae vix alpes nominandae, quum raro per totum annum niuem conseruant. Inueni vero Veronicam alpinam, Sphagnum alpinum, Lycopodium alpinum, Sibbaldiam, Fragariam sterilem, Cerastium alpinum, Saxifragam stellarem, hypnoidem, Rubum chamaemorum, Festucam viuiparam, Monotropam, Pilulariam, Astragalum arenarium, Plantaginem vnifloram, Chrysosplenium oppositifolium, Zosteram, Saniculam, Saxifragam Hirculum, Pyrolam secundam, Caricem pulicarem, Trollium Europaeum, Ophrydem cordatam, Alchemillam al-